

# Dithero tsa Tirelano mo Kutlwanong

42/2015 Thero ka Sontaga wa 10 morago ga moletlo wa Borarobongwe, le ya moletlo wa mišene, e le ka 09. 08. 2015

## Sontaga wa go gopola tshenyego ya Jerusalema, le ya moletlo wa mišene

### Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno, le kwadilwe mo go Pes. 33:12, le re: **"Go sego morafe o MORENA e leng Modimo wa ona, batho ba a ba itlhaoletseng go nna boswa jwa gagwe."**

Le lona le le okamelang moletlo wa mišene, le kwadilwe mo go Jes. 45:22, le re: **"Sokologelang kwa go nna gore lo tle lo pholosiwe, lona dikhutlo tsotlhe tsa lefatshe."**

1. Sefela sa 265 - 247/257

**2. Thapelo:** Morena Modimo, Rara yo o kutlwelobotlhoko, yo o sa itumeleleng tatlhego ya baleofi, re lebogela tlhoafalo ya gago ka Mopholosi wa rona Jesu Keresete. O re thuse gore re mo utlwe, re mo amogele, re ineele mo go ene, fa a re laola, le go re roma. O re abele ditshegofatso ka ene. Amen.

3. Lefoko la Testamente e kgologolo le kwadilwe mo go 2 Dikg. 25:8-12; la moletlo wa mišene Jer. 15:19-21;

Epistolo ka fa thulaganyong ya 2 e kwadilwe mo go Baroma 11:25-32; ya moletlo wa mišene: Bafil. 1:12-21;

Efangele ka fa thulaganyong ya 3 e kwadilwe mo go Luka 19:41-48, ya ntlha ya moletlo wa mišene: mo go Math. 28:16-28;

4. A go ipolelwe tumelo ya bokeresete!

5. Sefela sa 263 - 245/255

6. Thapelo ya mmadi wa thero.

**7. Efangele** ka fa thulaganyong ya 3 e e tlhomamiseditsweng moletlo wa mišene e kwadilwe mo go Math. 9:35-38, e re: "Jaanong Jesu a tlatlologanya metse le metsana yotlhe, a ntse a ruta mo disenagogeng tsa bone, a rera Efangele ya puso, a fodisa malwetse otlhe le makoa otlhe. Ya re a bona bontsi jwa batho, a ba tlhomogela pelo; gone ba ne ba bogisegile, ba

lapile jaaka dinku tse di se nang modisa. Ke fa a raya barutwa ba gagwe a re: 'Thobo e kgolo, mme badiri ba a tlhabela. Ka moo he, rapelang Morena wa thobo gore a romele badiri mo thogong ya gagwe.'" Amen.

**8. Thero:** Ditsala tsa Morena wa rona Jesu Keresete, Tiro ya thomo bo tlhaga mo pelong ya Modimo o o osi fela. Modimo Rara a tlatse pelo le botshelo jwa ga Morwawe Morena wa rona Jesu Keresete ka boutlwelobotlhoko, a tsoseletsa Kereke ya bokeresete ka go tlhotlhelediwa ke Mowa o o Boitshepo gore e rapele mo leineng la ga Keresete go kopela thobo ya gagwe badiri. Amen.

Thomo e tlhagile mo pelong ya Modimo. Go na le Modimo o o osi fela, e bong Rara le Morwa le Mowa o o Boitshepo. Ga go na o mongwe. Go tswa mo tshimologong o o Borarobongwe o o Boitshepo o tlhomile, wa ikaelela go re pholosa, rona ba re leng batho ba lefatshe lotlhe, le go re golola mo bosuleng jo bothathu, e bong bolele, loso le Satane. Ka bontle jwa ona jo bo fetang tlhaloganyo ya rona Modimo o o osi o le Morena yo o esi yo a ipaakanya go nna motho mo go Morwaaona, ene yo o esi yo a re pholose mmogo le bana ba rona, le lefatshe lotlhe. Morwa Modimo o tlhometswe go tsalwa ke mosadi, a tsalelwe go tšhwetla tlhogo ya noga ya bogologolo, le go baakanyetsa batho botlhe boitshwarelo jwa maleo, botshelo le pholoso ya rona le batho botlhe ba merafe yotlhe go ya mo dikhutlong tsa lefatshe, gore re bilediwe, le go busediwa mo Modimong. Ke tsona tse Modimo o solofeditse Atame le Efa, ya re ba sena go wela mo boleong, le Noah le dikokomane tsa gagwe, Aborahama, Moše, le baporofeti botlhe ba ne ba porofeta go tsoseletsa ka metlha go dumela gore Kereke e esi e e boitshepo e nne teng ka dipaka tsotlhe mo mafatsheng a lefatshe, e itshupe ka fa boipolelong jo bo reng: **Kereke e le nngwe fela e e boitshepo ya bokeresete e tlhomame ruri ka metlha yotlhe.** Kereke e, ke phuthago ya baitshepi le badumedi botlhe kwa Efangele e rutiwang ka tshwanelo teng, le disakaramente di abelwang ka tshwanelo ka fa Efangeleng." Go diragala jalo, jaaka kereke e le teng mo dikakeng, mo ditlhakatlhakeng mo mawatleng, mo dinageng, mo dithabeng, mo dikontinenteng tsotlhe. Go utlwala jalo ka dipolelo tsa Testamente e kgologolo le e ntšhwa. Lefoko la nna nama. Ka dipaka tsotlhe, ka dingwakgolo tsotlhe tsa dinyaga Modimo wa boloka tumelo ya nnete, e e leng tumelo e e pholosang ka go dumela mo Mopholosing wa nnete, e bong Jesu Keresete, yo e leng Morena le Modimo. Ka metlha tumelo eo e a rerwa, le go rutiwa ka go boelwa kwa le kwa, ka nako le ka yona e e seng nako go gatelelwa ka tlhoafalo e kgolo ditsholofetso tse di solofetsang go tshedisiwa, le go pholosiwa ka go dumela mo go Keresete, diteme tsa bareri di a lolwa gore go utlwale, le go

tlhaloganngwa sentle gore go rewang, fa go buiwa ka ga tshiamo ya ga Keresete e baleofi ba e balelwang ka go dumela mo go Jesu Keresete. Lefoko leo la tsholofetso laba nama mo dikgosing, mo baporofeting, le mo go baperesiti ba bogologolo ba ba tshwantshitseng setshwantsho se sentle sa Mopholosi yo o neng a solofediwa. Ga dirisiwa ke bona botlhe go ya go bonala ka tsholofetso e ntle thata ka mafoko a kwadilweng mo go Jes. 53:6-7, a a reng: "Rona rotlhe re ne re timetse jaaka dinku, mongwe le mongwe wa rona a fapogela mo tseleng ya gagwe, mme MORENA o ne a digela melato ya rona rotlhe mo go ene."

Lefoko la Modimo le le nnang nama - Morwa-Motho - Motlhanka yo o neng a boga - Jesu Keresete - Morena le Mopholosi wa rona o dirafaditse ditsholofetso tsotlhe tsa bogologolo. Mo go ene "ga a ka nna Ee le Nyaa, mme mo go ene go ntse go le Ee, gonne le fa go ka nna dipolelelopele tsa Modimo di le kae, di Ee mo go ene; ke ka moo re reng Amen ka ene go galaletsa Modimo." A dirafatsa tse a di rometsweng, tsotlhe tse Rraagwe a di ikaeletseng gore o tla di dirafatsa tsa dithaelo, tse di molemo tse Rraagwe a di ikaeletseng gore Morwawe a di baakanyetse batho botlhe, o di weditse, jaaka Kereke ya Lutere e opela ka ga go rongwa ga Morwa ke Rraagwe ka sefela se se reng: "Kwanyana yona e ` tsileng ke tsala ya me ruri. Ke Jesu yo o romilweng ke Rraagwe mono gore a agisanye lefatsheng basenyi le Modimo teng. O mo reile a re: 'Morwaaka, ya teng kwa bathong, ba ba losong le thogakong, o ba bogele petso.'" Morwa a araba, a re: "Ee, Rra, ka pelo yotlhe, ee, bokete ke a lo rwala, mme tsotlhe tse o di ratang, ke tla di dirafatsa.' Lorato loo lo kana kang, ee, ke lo lo gakgamatsang, lo lo fenyang Modimo. Lo isa ruri thogakong le mo losong le mo phupung Morena Jesu Kriste." Morwa Modimo a utlwa Rraagwe, a dira ka fa thatong ya gagwe. A dira tiro mo boemong jwa rona go re baakanyetsa pholoso, jaaka Rraagwe a setse a tlhomile ka maikaelelo a gagwe, go simolola ka tseo tse di kwadilweng ke Moše, fa noga ya bogologolo e tla loma serethe sa ga losika lwa mosadi, le ke ba bangwe, go ya di kopantswe tsotlhe ka fa go kwadilweng ka teng ke Jesaya 53;4-5 tsholofetso e e kopanyang tsotlhe ka mafoko a a utlwalang sentle tse di diragaditsweng ke Jesu, ka a a reng: "Mme ruri ene o rwele malwetse a rona, a sikara matlhoko a rona; mme rona ra itlhome, fa a bediwa, a itewa ke Modimo, a bogisiwa. Mme ene o phololelitswe ka ntlha ya maleo a rona, a teketelwa melato ya rona. Petso ya mo wela gore rona re bone kagiso. Mme re fodisitswe ka dintho tsa gagwe."

Ka jalo batho ba baakanyeditswe gore ba alafiwe ka go itshekisiwa mo mmeleng le mo moweng. Ka jalo go baakantswe tshiamo e e leng tshiamo mo matlhong a Modimo e e neng ya latlhega, fa batho ba ntlha ba ineetse mo boleong. Ka tiro ya ga Jesu Keresete re

baakanyeditswe tetlano ka thuanjo ya gagwe, le kagiso le Modimo. Tseo di baakanyeditswe batho botlhe ba merafe yotlhe ba dipaka tsotlhe. Ka go roma barutwa ba gagwe Morena o a rata gore tse re di baakanyeditsweng di isiwe mo go botlhe, ka gone Jesu e bile ke Modisa yo o molemo yo o ratang gore batho botlhe le bone ba ba sa ntseng ba ntse mo lefifing la ditimetso tsa dithuto le ditumelo tse di farologanyeng ba kgobokanngwe, ba busediwe mo lesakeng la gagwe, o rata gore dinku tsotlhe tse di timetseng, tse di lathegileng di boele gae, o kaela le rona, le go re tsoseletsa gore re dire tiro eo, re e itumelele ka borona, le ba bangwe ba bone thuso e ntle eo go rewa botlhe ba ba tlhomolang pelo, le fa e le bahumanegi, bahumi, banyatsiwa, batlotlegi, dikhutsana, masiela, bahutsafadi, balwetse ba ba mo losong, le botlhe ba ba rwesitsweng merwalo e e bokete, ba ba bosula le basiami. Morena o a ikaelela gore re thuse mo tirong eo ka dikabelo, ka go rapela gore a rome badiri mo tirong eo, ba rutiwe go itse sentle lefoko la Modimo ka fa tlhalosong ya lona mo maipolelong a Lutere, ba rutiwe mmogo le badumedi botlhe go ithapelela, le go rapelela ba ba sa dumeleng le ba ba sa kolobediwang. Ke ona maikaelelo a Mopholosi wa rona Jesu Keresete. Amen.

**9. Thapelo:** Morena, o ba tlhomogele pelo, o ba direle ka bopelotlhomogi batimedi le balatlhegi botlhe, bahumanegi, bahumi, banyatsiwa, batlotlegi, dikhutsana, masiela, bahutsafadi, balwetse ba ba mo losong, le botlhe ba ba rwesitsweng merwalo e e bokete, botlhe ba ba sa tlholeng ba dumela mo go wena, le ba ba iseng ba kolobediwe mo leineng la Modimo o o Borarobongwe, botlhe ba ba bogisegileng, ba ba lapileng jaaka dinku tse di se nang modisa. O ba thuse botlhe gore ba bone badisa ba ba tla ikanyegang go ba disa ka lefoko la Efangele le disakaramente tsa gago. Re kopa jalo ka ntlha ya lorato lo logolo lwa gago, le ka ntlha ya kopo ya gago gore go rongwe badiri mo thobong e kgolo ya gago, ba baakanyediwe tiro ya go disa sentle ka fa lefokong la gago ka go farologanya molao le Efangele sentle, le ka disakaramente tse di tlhomilweng ke wena. A go lebogwe, le go bokwa leina la gago, Jesu Keresete, Modisa yo o molemo, Morena, le Mopholosi wa rona. Amen. Thapelo ya Morena: Rara wa rona yo o mo legodimong ...

#### 10. Sefela sa 261 - 243/253

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke K. P. P. W. Weber, ka ngwaga wa 2015

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.